

## **Plenchi**

### **Bèl a bati**

**TRINGG TRINGGG bèlèm..... TRINGG TRINGGG bèlèm.....**

**Yega yega bin kompañã nos riba plenchi di skol. Nos tin awe diferente informashon. Fatima College ku su trabounan pa konsientisá hóbenan di importansia pa tene nos isla limpi.**

**Nos tin tambe Maria Auxiliadora ku ta gradisido pa e trabounan di mantenshon na nan skol.**

**Tambe nos a yama danki na Karina Lombardi, direktor finansiero di RK, pa su 13 añanan di trabou na bienestar di enseñansa katólíko.**

**Relahá, kue un poko awa kòfi of té, miranda ku ta hasi friu e dianan aki, i subi bo Plenchi faborito. Un felis wikènt.**

### **Riba roster**

Luna di limpiesa na **Fatima College**

Luna di sèptèmber ta Luna di Limpiesa. Mirando kiko humanidat ta hasiendo ku su propio medio ambiente mundialmente ta importante pa eduká muchanan tokante kon atendé di un forma mas responsabel ku medio ambiente. Tambe ta un realidat ku e muchanan di awe por hunga un ròl importante den e forma ku hende lo atendé den un futuro serkano. Den e kuadro aki na Fatima College pa algun tempu kaba a trata ku e muchanan e konsekuensianan di plèstik pa bida di animalnan i a largo plaso e efekto ku plèstik por tin pa nos salú. GreenKidz a drenta skol dunando aktividatnan di formashon na alumnonan i durante un mèrdia duna maestronan informashon ku nan por uza pa trata den lèsnan ku alumnonan ta haña.

Den e Luna di Limpiesa aki nos ta enfatisá e importansia di un medio ambiente mas limpi posibel pa nos biba aden. Durante e luna aki ta trata tambe limpiesa korporal i di mente. Dikon ta importante pa tene nos kurpa limpi, nos kamber, kas, kurá, bario.

E tema a kuminsá haña atenshon na apertura di luna ora ku primeramente Minister di Enseñansa, señora Alcalá-Walle, a dirigí su mes na alumnonan. Señora Alcalá-Walle a enfatisá e importansia di tene nos medio ambiente limpi. Na mes momentu señora minister a informá alumnonan ku luna di sèptèmber ta luna di Hende Grandi tambe.

Despues tabata representantenan di Selikor ku a hasi un aktividat pa purba hasi nos alumnonan konsiente ku nan por kontribuí na kuido nos medio ambiente. Ku nan por hasi esaki tirando nan shushi den kos di shushi. E

representantenan di Selikor a finalisá nan presentashon ku un wega durante kua gruponan a kompetí kontra otro.

Durante sèptèmber tabatin mas fecha dediká na e tema aki na Fatima College.

Djasabra dia 15 di sèptèmber tabata dia di World Clean Up Day. Dos grupo di Fatima College a sali pa kontribuí na dos sitio diferente ku limpiamentu di nos medio ambiente. Un grupo a partisipá na aktividatnan di limpieza ku tabatin den Suffisant limpiando rondó di skol. I un otro grupo di alumno a hasi trabou di limpieza den Saliña.

Banda di esaki su siman siguiente na skol un blekero a traha beker pa bebe awa ku un grupo di alumno. Aki a hasi uzo di bleki di komestibel ku nòrmalmente nos ta benta afó. I otro grupo a traha dekorashon ku kalbas den kuadro di e tema “Resiklahe”. I ken sa si e dos aktividatnan aki lo no a inspirá un òf mas alumno pa hasi uzo di loke nan a eksperensia i a mira un manera pa gana nan pan di kada dia den futuro. Muchanan a “soldeer”, opservá, fèrf i pinta. Nan a hasi uzo di nan kreativitat pa yega na un produkto final prinsipalmente trahando ku e kalbasnan.

E dos pèsonanan ku a guia e muchanan den e dos tayernan tabata señor de Palm i señor Freddy Villanueva. Tur dos ta habitante di barío di Suffisant. Banda di esei Freddy ta un eks-alumno di Fatima College. Tabata un plaser pa mira e dos pèsonanan aki komuniká ku e alumnonan. Ku dedikashon i amor.

Durante luna alumnonan huntu ku nan maestronan mester a resiklá material ku nòrmalmente ta tira afó pa produsí kosnan di uzo. Ku loke nan a produsí a organisá un eksposishon ku a habri dia 27 di sèptèmber pa tur interesá.

E idea ta pa durante aña akomulá sierto tipo di sushi pa periódikamente deshasí di nan na un manera responsabel. Por ehèmpel por akomulá papel, plèstik, aluminio, èts. Esei mester disidí ainda.

Ku e proyekto aki nos ta spera di a logra hasi nos alumnonan mas konsiente di importansia di tene nos medio ambiente limpi. I ku nan lo hasi loke ta na nan alkanse pa deshasí di nan shushi na un manera responsabel.



## **Not'é riba bòrchi**

**Kolegio Maria Auxiliadora** ta super agradesido ku e kompania Grant Thornton a skohe nos skol pa nan por a hasi "community work".

E kompania a sera su portanan djabierne 14 di September merdia, i laga tur trahado bin KMA pa start e proseso di ferf nos skol.

Nan a laga un ferfdo sigi ku e trabounan pa nan i nos ta den fase final.

Masha masha danki na Gran Thornton un bia mas.



**Den agènda**  
**21 desember te ku 4 yanuari**

## Un preñchi

RK a yama danki na **Karina Lombardi** pa su trabounan balioso na bienestar di enseñansa katóliko..

Despues di a traha 13 aña ku alma i kurason pa RK den e funshon di direktor di finansas, Karina Lombardi, a asepta un otro reto. Komo muestra di apresio, personal di kantor a traha un obra bunita pé komo rekuerdo. Tabata un “yama danki” masha simpel pero un ambiente dushi.

Durante Karina su 13 añanan el a soru pa nos atministrashon finansiero ta transparente i bon regla. Nos a kumpli ku tur eskigensia i nos relatonan anual tabata semper na tempu. E tabata e motor pa trese IT den nos skolnan di fundeshi for di 10 aña pasa. Tur skol di fundeshi a haña un digibord pa presentá nan lèsnan na un manera mas atraktivo.

Banda di esei un di e logronan di mas grandi ta e lokalidat nobo pa Soeur Hedwig school na st. Maria.

Riba e potret boso por mira e regalo ku el a risibí di parti di personal di kantor. Karina masha danki i ku bendishon di Señor kompañabu unda ku bo bai. Nos sa ku unda ku bo bai bo lo hasi bon trabou.





## **Mucha djispou**

**Mener:** “Sandra, bisa mener den kua tempu e frase aki ta: Mi ta buska un frei”.

**Sandra:** “Tempu pèrdi”